



Ernst Burren
No einisch
uf d Maledive

Mundarttexte

Cosmos Verlag

Ernst Burren
No einisch uf d Maledive

Ernst Burren

No einisch uf d Maledive

Mundarttexte

Cosmos Verlag

Die Herausgabe dieses Buches wurde unterstützt durch
einen Beitrag des Kantons Solothurn

Alle Rechte vorbehalten

© 2014 by Cosmos Verlag, CH-3074 Muri bei Bern

Lektorat: Roland Schärer

Umschlag: Stephan Bundi, Boll

Satz und Druck: Schlaefli & Maurer AG, Uetendorf

Einband: Schumacher AG, Schmitten

ISBN 978-3-305-00417-1

www.cosmosverlag.ch

inhalt

d direttissima	7
wenn s puff brönnt	13
d wohrheit	19
nie vüu gret	20
uf üs lost niemer	21
was eso passiert	22
denn – jetze	23
dr wieland	24
erziehig	26
d carmen wird drüber ewäggho	27
e schwarze im wc	31
dr eget wäg	36
erfahre	37
entwicklig	38
dr raul isch kei van gogh	39
unerwünshti tröim	44
afang und ändi	47
dr nüi wasserhane	48
am tischler si frou	49
hemingway	51
bruuche	58
dräck	59
drümou rüebli	60
d uhremacherferie	67
d fabriggschliessig	69
s nüie superhuen	73
d salami uf em bärg	79

s tote meersüili 82
zweni charakter 85
d angscht um s outo 87
wiissi plastigschtüeu 89
es guets gedächtnis 96
die nüii chüuche 98
dr beobachter 100
znacht am öufi 101
problem mit em öuterwärde 105
uf em gipfu 106
s aute huen 113
glicch 115
no einisch 116
blödi momänt 117
dr einzig sinn 119
chaubsläbere und fischfilee 121
die letschi rui 126
hundert 127
allahabad 132
schiffsschrube 139
was me cha wüsse 141

d direttissima

d tante lea het mir geschter am morge aglütet
und ganz ufgregt verzöüt
si heigi i dr letschte nacht öppe am zäni
i garte usegluegt und es grosses schwarzes tier gseh
mit emene länge schwanz

de sigi ihre i sinn cho
das tier chönnti dä panther si
wo jetze do im bärnbiet i de wäuder umelouft

d lea het dr polizei aglütet
die hei dr garte usglüüchtet
aber dä panther isch nümme ume gsi

si het mir de verrote
dass si öppe i drei monet mit ihrem läbe schluss machi
si heigi jetze aues no säuber organisiert

i ha vo ihrer schweschter gwüsst
dass es kei sinn meh het
se vor däm vorzitige ändi abzhaute
si wott eifach nümme mit ihrne schmärze witerläbe
und het gnue vo auem

i ha zum ma gseit
dä panther macht mir schon echlei angscht
es isch haut gliich guet hei mir e waffe im huus

dass ne chasch abeschiess
wenn är i üsem garte uftouchet

aber dr roli het gmeint
är machi de zerscht non e foto von em
wüu är für die vonere zitig 3000 franke überchiemti

dr schweschter vo dr lea
am bernadette ischs furchtbar zwider
dass die lea um z töde nümme wott witerläbe
d bernadette meint es göngi ihre
nit nume drum dass si ihri schmärze nümme ushauti
si wöui eifach säuber
über ihres läbesändi beschimme
d lea heigi ihre chopf haut es läbe lang
gäge aui widerschtänd düregsetzt
si sigi immer e grossi egoischtin gsi
und heigi nie uf öpper glost

drum isch si ou nit lang ghürotet gsi
ihre ma het denn scho nach es paar monet gseit
är heigi sich unger ere eh
öppis angers vorgschtöt

d lea liidet jo gar nid unger ere tödliche chrankheit
wägem härz und dr artrose mues si tablette näh
das müesse vüu angeri ou und Gä wäge däm nid uuf
ihri reumatische glänk
chönnt me dür künsttliche ersetze
aber d lea het gseit
e settige blödsinn chömi für si nid in frog

natürlich isch si jetze 84 und chönnti äüä
nümme lang elleini i ihrer wohnig läbe
aber vilecht chönnti si imene heim
non es paar schöni johr verbringe
aber si het dr bernadette gseit
dä langsam abschtig bis es de überhaupt
nümme göii machi si nit mit
si heigi i jedere beziehig immer d direttissima gno

dass si dä panther i ihrem garte het gseh
gloube ere sowiso nid
aber si chas bis zletscht nit lo si
sich wichtig z mache
ou wenn de d polizei wäge nüt mues usrücke

das isch immer lächerlich gsi
wie si sich bis is höche auter het gschminget
blondi perügge het treit
und a jedere hundsverlochete isch uftouchet
mit ihrne fründe wo wäge ihrne artrose
fasch nümme hei chönne loufe

aus jung isch d lea aber ganz e schöni frou gsi
si het gäng e gueti luune verbreitet
und a de familiefeschtle d schlager gsunge
vo dr caterina valente
Steig in das Traumboot der Liebe
fahre mit mir nach Hawaii
dort auf der Insel der Schönheit
wartet das Glück auf uns zwei

uf das lied hei sich gäng aui gfröit
und vüu si dr meinig gsi
si singis besser aus d valente säuber

denn hätti me sich nit chönne vorschtöue
dass d lea einisch vo sich uus ihrem läbe
würdi es ändi mache
das isch eifach scho himutruurig

aber dr roli seit gäng
mir wüsse nit was si i de letschte johr
aues düregmacht het dass si jetze nümme ma
und vilecht het si haut gliich gäng drunger glitte
dass si kei familie het gha

sit ihri fründinne gschorbe si
wo si früecher mit ne het tennis gschpüüt
oder öppe mit ne het gjasset
het d lea ihre läbeswüue gäng wie meh verlore

das mues furchtbar si für d lea
wenn de dä ma mit sim gift chunnt
vilecht singt si bevor sis trinkt no einisch
Steig in das Traumboot der Liebe

dä panther sigi vo süddütschland zu üs cho
i bi gschpannt wie lang dass es geit
bis är abgschosse wird
de wird das arme tier ou erlöst
vo sire einsamkeit

dr herr anderegg wo üs s minerauwasser bringt
het mir geschter verzöt
ihm heigi chürzlich e frou aglüte
är söui die lääre harasse cho hole
wenn är s nöchschte mou verbichömi
sigi si nümme do
i zwe tag chömi eine vo dr exit

woni das am ma ha verzöt het är gmeint
das wird äüä mode unger de aute mönsche
wo gnue hei vo auem

i weis nit wär d lea aues zu ihrem
abschidsfescht het iglade
dr roli und i sötte jo ou go
nächhär wott si no mit öpperem es paar tag is tessin
es weis niemer wär das isch
hoffentlich geit si nid öppe ellei
das wär de doch es z grosses risiko

was wei mir de a däm abschidsfescht mache
eso öppis hei mir jetze no nie erläbt
dr roli meint mir chönnte öpper sueche wo
Steig in das Traumboot der Liebe chiemti cho singe

i wetti dä obe wäri scho verbi
hoffentlich wird das nit z makaber

i beniide die mönsche wo einisch i dr nacht
chöi übereschlofe und nit no lang müesse liide
bis si de ändlich chöi go

d lea dänkt ebe äüä genau gliich
und drum het si jetze die möglichkeit gwäut
für vo dere wäut abzträtte

wenn mir zäme vom tod rede meint dr roli immer
am schönschte wärs wenn mir beidi
am gliiche tag chönnte go

wenn du zerscht geisch
chumi sowiso schnäu hingenoche
verschpricht mir dr roli immer

aber i dänke de aube warte mirs ab
du hesch mängs verschproche unds nit ghaute
i gsehs jo de